

"Na ta dioferente cu Texas EquuSearch"

Comisario Dompig impresiona cu forma di traha di e grupo di Florida



ORANJESTAD (AAN): Comisario Gerold Dompig di Warda di Polis Noord, a bisa cu nan a duna OK na e grupo nobo di West Palm Beach, Florida, cu a bin Aruba pa yuda busca riba beach pa Natalee.

Polis sa cu e cachonan aki ta specialmente entrena, y nan a nota caba cu e sistema di buskeda ta full diferente cu Texas EquuSearch di Tim Miller. Comisario Dompig a ripara cu nan ta trahando hopi profesional, laborando segun e sistema di Polis.

Aki e Comisario di Noord a splica DIARIO, cu e grupo di Florida ta cera e lugar bon y corecto, y e forma di buskeda ta mas eficiente.

Danki na e grupo di Florida aki, cada biaha cu nan "clear" un area, e ora Polis di Aruba tin siguranza cu e "area" ey por worde exclui. Asina lo sigui pa e siguiente tereno.

DIARIO a splica caba na varios ocasion, cu e dos cachonan entrena aki, ta special pa detecta cadaver cu ta dera den santo banda di laman. Esey ta algo hopi dificil pa cualkier otro cacho, debi na e concentracion halto di salo den e aire, cu semper ta despista cualkier animal.

Lo yega un fin kizas un dia riba e investigacion pa cu desaparicion di Natalee? DIARIO a puntra Comisario

Dompig esaki, y el a bisa: "Claro".

Aunke Comisario ta spera cu esey lo no socede, y cu e lo bira un 'cold case', tog e ta bisa: "Ta normal cu cada investigacion lo yega na un dia unda autoridad lo bisa cu e tempo a yega pa e worde para." Pasobra tin hopi otro investigacion pa haci.

Comisario Dompig a desmenti cu debi na 'presion', pesey keto bay e investigacion ta andando. No obstante, e hecho cu number di "Aruba" ta den wega, pesey ta bira mas importante pa sigui traha duro riba e investigacion.

E Hefe di Polis di Noord a sigui bisa cu e sosten cu nan ta ricibi di Gobierno ta algo cu nan ta satisfecho cune. "Mi no tin nada di keha," Dompig a bisa. Autoridad semper ta traha bao maneho di Gobierno, y den e caso di Natalee, tur hende sa cu mester enfoca riba e asunto, aunke ta haya distraccion tin biaha di prensa, tog ta sigui investiga y enfoca.

Comisario Dompig ta lamenta cu e "testigo principal" den e caso te cu awor, esta e Hardinero, no a bin dilanti mas. Pa un of otro motibo, e testigo lo tin miedo di bin dilanti.

El a confirma na DIARIO, cu keto bay Polis ta buscando e persona